

四庫全書

集部

欽定四庫全書

集部

楊李詩繫卷十四

詳校官侍講_臣王燕緒

主事銜_臣徐以坤覆勘

總校官進士_臣朱鈐

校對官修撰_臣吳錫齡

謄錄監生_臣黃楷

欽定四庫全書

楊李詩繫卷十四

平湖沈季友編

明

沈繼山先生思孝

思孝字純父號繼山嘉興人隆慶戊辰進士神廟
初為刑部主事疏論江陵奪情杖八十戊廣東神
電衛踉蹌萬里徒步行亂山深樹間就獠族寄食

比至劉撫令因致之思孝乃仗劍往至恩平謂縣令毛鳳彩曰撫軍年已望八班在六卿欲殺罪人取媚權相故來赴死耳但不知若何面目見天下士大夫毛與劉皆楚人見思孝意不善遂款之馳書止劉蔡觀察文範作仗劍行指此也江陵沒賜歸晉尚寶丞歷遷府尹思孝感上恩益發舒無少顧忌浸失當事意調南太僕卿時御史房震以私憾詆海忠介有三進士上書直忠介俱罷去思孝

疏救有旨切責乃嘆曰時事如此不去將自及遂
拂衣歸久之起右僉都出撫陝西寧夏難作思孝
躬擐甲胄出窮塞轉餉濟師而為督臣所擠移河
南不赴尋召為大理卿論殺內官郝金後晉工部
侍郎右都御史兼兵部侍郎疏減羊絨及止盛甲
之請省金錢無筭日本封貢議起上疏力爭不得
乞歸家居蕭然築繡野莊以老天啟初贈太子少
保著有行戍郊居西征陸沉漫稿溪山堂吾美堂

等集其詩格調幽疎聲文華潔長於近體使先生
不以功名顯猶當獨立詞場孤遊藝圃况矯矯者
耶求諸文行之途可謂全人矣

調撫中州上疏乞休作

優詔及潛夫秋風病未蘓雨荒深院菊霜落半庭梧豈
合中諸嶽唯應長五湖天王自明聖休咎肯容無

同叔祥宿雲山上人禪院

可是津梁倦祇林共息機講師名寶月賦客字玄暉香

積分齋飯泉堂施浴衣苦吟眠未穩松月夜鐘微

冬日遊虎丘

侵曉入蕭寺寒山霧裏登鏡殘香塚月劒合碧池水野
飯新辭祿禪衣舊賜繒回頭看悟石遙憶六朝僧

秋夜劉玄子過飲時玄子還自遼左

西堂秋氣清上客過劉生共把鵝黃酒高談鴨綠兵三
邊來燧色萬井急砧聲持贈唯雄劒燈前風雨鳴

夏過能仁寺秀雲禪房

考見題咏
宣公祠

精舍石橋東停舟訪遠公諸天初見月大地旋生風火
乞紅蓮裏香聞綠桂中更憐功德水能洗俗塵空

九日在告與叔祥小飲

何處不登臺門扃一徑苔官貧黃菊少客好綠尊開寒
色衣初授陽春曲並裁科頭松下坐遮莫朔風來

送戴給諫謫戍嶺南

倉皇出禁垣時事不堪論得罪緣宗社全生是主恩猿
聲雲外戍椰葉海邊村獨喜扶桑近光生照覆盆

贈殷方叔徵士

居然大布衣所貴在知希卧雪非中聖占星是少微兒
驅晴犢出婦摘晚菰歸除却催詩債誰敲白板扉

夏日過皋兒別業

衡門盡日閒野趣獨相關池割湖南雨雲封海上山田
家攜酒過江燕喜人還寂寞幽源裏居然銷夏灣

秋日閒居

堠火照西州專征白露秋蓬婆城不閉羅鬼戍還留轉

餉盤江惡徵兵蜀道愁銅標誰更勒空憶武鄉侯

李季常過訪

息駕在雲林多君遠見尋狂將郢中唱調入廣陵琴聽
雨嫌宵短憐秋坐竹深當杯莫言返天地幾知音

喻邦相仝羨長集怨醉軒

白雲邀上客黃葉繞貧居缸面沽來酒槎頭膾得魚山
川連越絕雞犬類秦餘一日千秋意相看老不疎

京邸懷綠蘿莊

笑我遊燕似客卿五湖三畝獨鍾情
種魚可有千頭美養鶴將無六翮成
池上墨花沉夜雨簾前帶草自春晴
明朝定乞初衣去肯使山靈謝姓名

行邊

青春蹀躞紫驂騑又見邊城葉作秋
橫槊漫題鸚鵡賦登壇猶着鷓鴣裘
尊前八陣生風雨腰下雙鉤燭斗牛
翻笑故人稱燕領自來無意覓封侯

趙張二閣老以書勉慰故云

漫興

淒淒涼雨醉初醒
草長閒門晝亦扃
但使拂衣辭鵲印

不妨胠篋有鵝經

時鄒給事劾予以千金市右軍真跡

病來鬢向愁中白

興盡山從夢裏青
漫道主恩歸未得
東吳已著少微星

立秋

萬里秋生督亢亭
暮蟬寒葉豈堪聽
愁來自厭屠龍技
老去誰憐相馬經
塞上風烟高太白
雨中山色落空青
銜杯漫遣蕭條意
不謂人間忌獨醒

胡元瑞將歸蘭溪以詩言別作此留之

蕭蕭黃葉度寒窗萬里歸心繫短腰聖代終須收竹箭
故人何必卧桐江將雛且聽房中曲泛燈還傾燭下缸
傳語五陵諸俠少好容文苑樹麾幢

有所聞

虛傳物色動燕州愧我浮名已白頭馬角生來殊感晚
蛾眉妬後不禁秋帷中運策惟三相塞外橫戈有列侯
曛曉便攜雙漿去桃花深處覓漁舟

送黃履常赴楚任

桃花紅露柳枝黃相送河橋綠滿觴北極久占卿士月
南天暫借使君霜帆前雁叫過彭蠡江上魚肥到武昌
况是古來春雪地和歌知爾興偏長

答寄張明成閣老

當年心共繫安危一別滄桑未可知龍劒夜占南斗近
鴻書寒下朔風遲黃茅應變還丹日黑髮仍留去國時
底事先憂消不得並垂清淚濕江蘼

立秋

刀尺新裁白苧輕，寂寥山館早涼生。
雲窺林外雙鴻影，蟲識堦前落葉聲。
九塞羽書初告急，六宮紈扇幾含情。
總知秋色江湖好，為買鱸魚壓酒鐺。

六十初度

煙雲滿眼足憑闌，殊勝風波行路難。
名士已裁生誌就，野人猶索諫書看。
飯炊香稻分雲白，盤出青菰帶雨寒。
神武近應無客到，相逢多訝鴟為冠。

寄懷史奉常

松雲祗隔五湖流。湖畔年年憶舊遊。病懶我曾無雁字。

時清君亦愛羊裘。縱憐玉女潭邊月。

史有園在玉女潭側

應念金

人掌上秋。見說追鋒方四出。林中猿鶴漫相留。

座上初見周文因懷辛謙之

乾雀雙雙繞樹喧。七香車忽到閒園。調歌自薄鴛文錦。
得意誰誇犢鼻褌。籬外花開酣白墮。天涯葉落怨黃昏。
憐新怪底偏懷舊。銀燭燒來見淚痕。

初夏雨中卧病有懷朱心園

空林雨氣未全收，枕簟涼生半似秋。
艾以三年成立骨，蓬知一月不梳頭。
臨風輕顫荷珠落，坐石徐看竹粉抽。
漫道長桑元客舍，故教盲豎尚淹留。

秋日繡野莊即事

萬竿清玉小窗西，鼓枻來看日欲低。
當下開簾驅野馬，可中分食施山雞。
碧梧葉墜仍三徑，香稻花垂定幾畦。
客有求羊誰復至，獨留明月伴幽棲。

訪王百穀賦贈

春風載索到詞壇
旗鼓知君意未闌
酒綠且留狂客飲
花嬌任擁細君看
臨將舊草名鵝帖
著得新篇號鵝冠
翠竹倚窗添幾個
蕭蕭長護白雲寒

吳江道中同叔祥釋凡可

片席斜飛起夕陽
一尊相共答滄浪
人間只合尋鷗侶
僧好何須識雁王
簾外樹低江市月
盤中橘冷洞庭霜
計程堪作平原飲
欲向青帘典鷓鴣

哭徐子與先生

寂寞搗玄尚有亭蕭蕭拱木若為聽青蘿自合依山鬼
下箸真疑墜酒星龍去儘埋豐獄劒鶴歸須啞太湖萍
不堪門戶風流遠淚灑斜陽石上銘

吳興城南卽事

翻然載橐傍孤城一笑高天雙眼明刺史洲空白蘋老
尚書社冷碧苔生地偏不獨堪棲隱時難空閒好避兵
最是峴山朝暮見可容題却寓公名

李尚寶樂

樂字彥和號臨川桐鄉青鎮人隆慶戊辰進士由
縣令拜禮科給事終尚寶卿所至以清直稱有見
聞雜記烏青誌

長林石徑

在密印
寺內

散躅探幽幾度來徑開如矢淨無埃年年溪上春歸後
千樹陰濃覆石苔

鍾郎中庚陽

庚陽字長卿號西星秀水人隆慶戊辰進士官刑

部郎有焚餘草

真州守風岳水部石帆移酌舟中

同是飄零客江濱載酒過潮生秋氣早樹帶夕陽多鳩
拙方棲棘鴻冥豈受羅相看此風色不飲夜如何

周學博雲石

雲石失名嘉興人隆慶間揚州學博有泮鳴集

送彭主簿去官還重慶

曉促征夫設去輪西風撲刺馬頭塵拊膺白日誰知我

仰面青山不顧人
巫峽天低雲氣黯
楚江潮淺石痕新
到家松菊開三徑
竹杖芒屨別有春

馬參政千乘

千乘字國良號映臺平湖人隆慶戊辰進士授分
宜令歷陞廣東僉事羅陽山多盜會兵平之晉四
川參議復遷廣東按察黎叛泛海諭降黎泣拜曰
此昔平羅陽使君也兄文學千里亦有盛名

題湖亭

此亭堪極目蕭瑟起幽思
帆路行平水雲陰上釣絲
九枝凝一碧連岫畫秋眉
憑對曲闌霽涼風吹杖藜

陸巡撫萬垓

萬垓字無畦號仲鶴菴之子
隆慶戊辰進士由部郎出守
蒼梧拊馴洞猺遣子就學尋
遷雲南副使緬寇亂親冒矢石
下兵隴川擒渠魁收叛卒聲震
西南累擢僉都御史巡撫江西
築圩千頃積穀百萬兩賑大荒
寃運歲輸回青費萬計垓力請
以土

青代之民困得甦卒於官立祠章江之上李贄有
詩哭之云二十年來但寄書草莽消息竟何如巨
卿未解山陽恨垂老那堪策素車

癸未春入覲南歸重過新嘉驛池亭

有序

丙子春余同李宏甫北上憩息此亭喜其佳勝命
酌論心於今八年未嘗一日忘也今宏甫已掛冠
高隱而余復行役過之景物依然感念中惻賦此
以紀所懷

芳亭春曉憶曾來千古襟期向此開
魯酒飲非河朔醉素心人是草玄
才層軒秀色仍蒼檜四壁新詩半綠苔
悵望冥鴻天萬里招尋空復意徘徊

自永趨騰經打板箐渡潞江宿八灣地勢盤鬱
炎瘴最深中間有磨盤風洞高梨岡分水嶺
蒲蠻哨五十三參皆危崖峻坂猿啼鳥語之
處平生所未嘗見者用韻漫咏

石盤風洞幾高低箐惡蒲蠻雜漢夸轉餉坐看民力盡

何時銷甲尉陀西

胡龍巖其久

其久字懋敬崇德人隆慶丁卯舉人官龍巖令

和蔡使君登尊經閣

高閣春雲滿追陪此眺臨關河千里色禮樂百年心樹
指青山遠鶯啼綠柳深談經誰上席有道屬於今

丁清惠公賓

賓字禮原晚號改亭嘉善人隆慶辛未進士為句

容令擢御史歷南大理太常鴻臚僉都提督操江
凡九任轉北京工部侍郎尋晉南京工部尚書前
後在留都三十年革債升科減月糧之弊除上江
二邑廂坊僉役之條濬浦口諸河以利涉廣京口
外塢以通漕復鎮江石橋勒船禁以救溺疏丹陽
朱巷濫泥河洪以溉田治南北四百里孔道甃石
蔭榆柳以便行旅其居官實政大抵如此尤好行
德於鄉老而彌篤年八十有八買小舟渡江謁孔

卷十四
林性儉朴卧榻無重茵下置一鷄比曉聞即起卒
贈太子太保謚清惠

謁方正學先生祠

花雨臺前石子岡孤墳松柏自蒼蒼從來灑淚成新土
何必遊魂返故鄉山色一林俱積翠江流千古半斜陽
欲知直道人心在祠廟于今信有光

洪郎中烝

烝字惟進號鸚洲平湖人隆慶辛未進士授陳州

知州停解京俵馬三百餘匹又議處河北歲派驛
費省數千金擢選部郎有來鶴軒稿子世基孝廉
有文名

錢塘懷古

山靈曾見紫宸朝蔓草銅駝久寂寥崖海星沉王氣盡
鼎湖龍去蹕聲遙英雄出塞魂猶壯臣妾和戎恨未消
城郭不殊風物異六陵鴉樹送寒潮

碧山學士黃洪憲

洪憲字懋忠號葵陽自稱碧山學士秀水人隆慶
丁卯解元辛未進士文名冠天下選庶吉士陞編
修奉使朝鮮止攜圖書數卷丁丑江陵以人望推
憲分較禮闈欲屬其子憲堅避之歷庶子少詹事
侍讀學士當憲初入翰林時為館課輒傾其曹前
輩無敢雁行者性又嚴峻好直言遂為時忌萬厯
戊子主順天試取王錫爵子衡為榜首李鴻又申
時行壻也言者遂以攻憲下廷臣覆試文皆如格

事乃白然憲遂自効求斥慰留再四疏上上竟告
疾歸著有皇明文憲朝鮮典志鑒坡制草學易詳
說學詩多識碧山學士稿等書詩頗俊雅不多作
其於文特精制藝神聖工巧合併為一評者謂其
體凡三變初為渾灝踔厲之文嘉靖辛酉甲子間
風氣冗弱先生與同里趙玉虹獨為古學救之以
精練典則隆慶辛未後文體復振皆先生力也庶
寅歸里文益簡淡高遠宦成之後嗜此不厭文成

人爭購為奇寶遠方之士重繭而來及門數百人
如會稽陶望齡晉陽王濬初華亭董其昌同郡朱
國祚陳懿典馮夢楨陶鑄甚衆嘗曰此王制也即
唐之詩宋之表也君子有從周之思切勿視為羔
雁其持論如此

同幻休上人登二祖庵遇雨

迢遞青山暮峻嶒石磴斜孤雲生杖履細雨濕袈裟林
靜時聞籥臺空欲散花何年謝塵鞅老此覓丹砂

達磨洞訪大鞋和尚

舊是傳燈地今棲玄鶴羣千峰窺積雪一衲擁寒雲掛鉢餐朝露忘言對夕曛知君超浩劫永勿墮聲聞

題駕湖秋月圖

澄湖明月浸樓臺一望波光萬頃開星轉銀河天外落風搖蘭棹靜中來蒹葭兩岫青楓合砧杵千門白雁催勝地總憐秋色裏幾人清夜踏歌回

登十三山

塞外客堯第一峰孤臣天畔寄萍踪胡笳吹墮關山月
漢壘陰銷瀚海烽巖樹晴光浮鷺鷥釵花秋老照芙蓉
從來細柳軍威壯勒石銘勲在幾重

過山海關

長城古堞瞰滄瀛百二河山擁上京銀海仙槎來漢使
玉關衰草戍秦兵星臨尾部雙龍合月照平沙萬馬鳴
聞道邊陲烽燧息書生直欲勒燕銘

郭按察子直

子直字舜舉崇德人隆慶辛未進士官閩臬有三
遊草歸後杜門掃迹招里中工詩者吳大令郡宋
山人旭西林僧明曠諸生沈穉圭等為芟山社子
張虛姪孟弢皆與焉方宋元時高人結社芟山姓
名莫攷至明初貝清江朱以貞輩繼其盛而舜舉
復行之風流不墜矣

小園

扶疎草樹繞空亭
隱几山光雨後青
吏散鴉啼明月上

一簾花影讀黃庭

薛序班文炳

文炳字有孚號鶴樓嘉興人隆慶間以胥授鴻臚
序班有調疴集鶴樓稿

題鶴樓壁

松閣茆檐夕照邊海山青列几闌前洞庭霜落柑如蜜
泖澤秋深雀帶綿白酒且從今日醉黃花不改舊時妍
不才性嬾成孤癖纔說為官便惘然

沈太學如封

如封字惻先一字是莊宏之子幼穎敏工詩尤精
八分施青州竣范司成應期咸器重之隆慶間入
太學不第歸而任誕放浪詩酒間好蓄古法書名
畫通曉太乙六壬遁甲演禽諸九流家言構樓黃
墩上眺陳山顏曰見山觴咏其中嘗言宋儒頭巾
氣撲人國朝摹擬先秦文者烏語耳著有見山樓
集北遊稿吳中蠶法

機婦吟

婉孌機中婦，燦爛機中錦。
將以獻天子，願補日月袞。
豈道風塵黯，顏色殘絲斷。
縑不成匹，意氣空驚抱璞人。
獨把流黃暗中泣。

姚秀才舜漁

舜漁字仲陽，號玄澤，充次子。
隆萬間文學詩非所長，特精禪理。
有西玄草。

訪秋潭上人不值

予亦逃禪者每來逢閉關不疑師避客但負我偷閒乞
食淹鄰曲經行過水灣暮禽歸欲盡佇久竟空還

石門山人宋旭

旭字初暘崇德人家石門號石門山人隆萬間布
衣好學通內外典能詩善八分尤以丹青擅名于
時層巒疊嶂邃壑幽林獨造神逸海內競購之年
七十有八茗上諸名流招致繪白雀寺壁時稱妙
絕與雲間莫廷韓同邑吕心文友善晚入爰山社

所作偈頌多透脫生死語非區區一藝之士也

卧雲樓與莫若江郭禮亭夜坐

春陰天欲雪
虛閣夜生寒
竹葉探鉤盡
梅花秉燭看
風塵餘短劒
時俗且高冠
無限憂時意
聞鷄耻素餐

賦得五峰秀色

在郡城天寧寺前

招提橫翠靄
駢峙兩三尖
仙掌高擎漢
佛頭青映簾
呪雲龍出鉢
施食鳥窺檐
示彼西來意
優曇取次拈

周珍

珍嘉善人

陳賢良祠

仰公高節拜公祠
每憶風溪落日遲
欲向白牛尋舊跡
幾行蒼蘚蝕殘碑

斗野山人郁敦易

敦易自號斗野山人
嘉善人父天民博學善詩文
纂靖難盡心錄敦易撰述頗多有言志稿

陳賢良祠

青苗新法世無何抗疏佳時志不磨廬阜峰巒曾眺覽
星湖風浪幾經過碧梧翠竹荒丘寂野草寒烟落照多
莫嘆山僧為伏臘裕陵無樹長新柯

沈璋

璋嘉善人

過淨蓮庵

不禁煩惱過僧房一靜從教萬慮忘白石有緣留我坐
青山無語笑人忙閒庭雨過藤花落古壁烟侵薜荔黃

獨倚小窗凝望處目隨孤鳥送斜陽

附考菴在嘉善
西十里元創

沈槃

槃嘉善人

過石井橋

石井塘隈小市廛步雲橋外蓼花鮮
輕橈載月隨風渡
乍送冥鴻過遠天

附考橋在嘉
善麟瑞鄉

過硯池灣

渚清沙白硯池灣
唱晚漁舟罷釣還
風致漫看元絕俗
一林疎柳澹秋烟

附考灣在嘉

善麟瑞鄉

姚秀才懋勲

懋勲嘉善人

胥山

山小秋容淡
登臨倍感傷
掛袍人去遠
磨劍石留光
風

露忠猶烈松濤怒未降
蘆花明月上歸興咏滄浪

沈嘉賓

嘉賓嘉善人

朱頂鰕

月色平鋪映碧流
孤村寂寞冷烟秋
偏憐澤國長鬚侶
也占朱衣一點頭

附考嘉善祥

符蕩中生此

顧忱

忱嘉善人

六斜塘

九里灣頭放棹行綠楊紅杏帶啼鶯望中咫尺西塘市
我亦曾來有舊盟

附考塘在嘉善西北五里

金景西

景西嘉興人

唐莊

清溪環抱碧村流
莊上花明宿雨收
壤接桑麻生意好
家全雞犬臘時優
林饒古木藏深屋
岼覆垂楊繫短舟
每到斜塘尋往蹟
故家文獻足風流

風涇

白牛塘上酒旗中
南北長橋掛綵虹
烟寺曉鐘蕉葉雨
水樓晴檻棟花風
衣冠文物名猶在
舟楫魚鹽利尚通
東望雲間酬二陸
舉杯南向酹宣公

破瓢道人吳孺子

孺子字少君號玄鐵蘭溪人性高僻有腴田頃許
盡易硯瘦鑿溝引山泉繞入玉雪厨銅池中曰如
此庶不辱自親釜竈耳以此破家及妻子喪徧遊
江湖所至率蕭寺及名流韻士家好採壽藤癭株
為几杖擊孟尊壺疊洗之屬手自摩挲光澤可鑒
客稍諦視輒不聽曰勿令為俗塵所觸嘗以數緡
市一大瓢過荆溪盜碎之抱而泣者累日王元美
作破瓢道人歌有一綠萼梅枝名紫玉又有一紅

斑竹形製奇古皆三代物也按孺子遊屐半海內
而吾郡尤數數往還始客於項氏戚氏或姚氏鍾
氏梅溪李氏海鹽錢氏及釋戒襄處最久後終於
梁溪

答旅中兒

僕本金華人少小親耒耜三十始讀書一命期強仕編
性命疎狂恠辭來哆侈一年復一年世事難料理面垢
鼻無紋短髮披兩耳飢落在江湖飢寒忍將死寄謝旅

中兒無勞問歷履間來澤畔吟顧影還自喜夜深魍魎啼遙拜相依倚躡電樹兩幢促我不能止駕之驂白螭羣從來何愧下視塵寰中茫茫若蜚螳

海上僦居

僦居來海上又是一家村日落旋吹角天寒早閉門無勞遊子恨不盡主人恩更喜南簷敞衰年且負暄

別錢懋穀

幾月為歡在君家花滿溪酒奢泉不竭詩細草能齊別

去情何恨重來路恐迷徘徊江上棹疑是武陵西

寄王元美

日暮歸鴉遍鄉心可奈何病隨新月長愁比落花多細
雨亂階草微風起夕波西陵有嚴武不必淚懸河

將歸溪上留別李將軍兼呈何太史

說謊定推何太史相嘲無奈李將軍桃花細雨且歸去
江上吹簫弄彩雲

題畫

玉露凌寒萬壑空
洞庭秋水醉芙蓉
小舟不放尋詩夢
撐入村南卧晚風

頑石老人陸光宙

光宙字與常號巨石晚稱頑石老人平湖人比部
伍塘子四歲而孤遘家難匿車中走京師至武惠
所十六補順天弟子員聞母訃南還一時飛鳧連
隕灰滅殆盡遂退處郊園晚年超絕世好與宋初
曷璩君瑕諸名輩友善每當初秋徂暑以紫薑青

豈破帽野航浮遊三泖間嘗泛震澤一白衣叟執
紅梅造舟宙曰必佳客也載與酣飲作紅梅詩以
別曾過嘉善觀幽澗泉寺僧不為禮乃題一詩於
壁云山僧不曉事客至莫呼茶羞殺澗泉井青苔
覆落花既去有一顯者見詩追跡之不得其托寄
高曠若此崇禎己巳夢一道士持靖節小像索題
諦視之即己也題云在晉為淵明躬耕辭五斗昔
以節自持今惟義自守千載復歸來春風吹五柳

曾識白蓮人遠公是吾友翼日遂逝年八十六有

鋤餘集

贈友詩十五首

送居士旭

摩詰畫山水自言皆夙因焉知宋居士乃非金粟身融
貫得妙理氣運奪鬼神堪與虎頭絕凡品何等倫覺路
一以開頓悟超上乘

璩山人之璞

君瑕負奇氣才藝真絕倫
天地總睥睨悠悠何足論
胸次富丘壑落筆生風雲
誰能賦鸚鵡令人美襴衡

沈丈人維錫

丈人名門子氣意挫不舒
古道世寡合况復閭里兒
珍庖宴佳客學仙愛樓居
途窮愈睚眦日暮耽詩書
陋巷樂不改太音知者希

沈太學文猗

矯矯沈公子薄榮負奇趣
制作耻雷同含毫想天際
開

軒玩鍾王篝燈了章句彼美瑚璉姿終為廟堂器

張烈士朗

張卿任俠烈歌嘯吳市中不憚貴公子罵坐開心胸沾
沾常自喜黃須炯方瞳書法亦遒勁吐奇或如虹軒然
慕遐舉望之其游龍

王儒林彥淳

孟還事筆研謀生亦何拙朝耕暮出門誰云耨不輟太
宰自虛左一刺懷中滅洗硯搗黃庭夷然而不屑彈鋏

歸來兮雙擁茂陵妾

王五經滕

王公祖道術飄飄儼神仙
遠慕古蒼頡六書究精研
篆隸法鐘鼎下筆能鈎玄
靜知草木性察見鳶魚天
嘆息茲人去入耳無微言

方高士道成

嫠老故多貲身著千金裘
任俠獵聲譽盡散裝吳鈎
易轍誦墳典上策不見收
文章古作者詩些洪波流
晚悟

無生理身世同浮漚頽然一貧衲不易五諸侯

胡先生順伯

胡翁鄞中客余家三世交內行實耿介外易同兒曹吟
詩貴真率為文喜不離頭白老書記功名等鴻毛

白蓮道人如本

道人故緇髡墨名乃儒行遁跡鸚鵡洲觀空照心鏡禪
悅每臨池作草銀鈎勁游戲竹下吟林鳥久相應一歸
祇陀園何時還出定

吳山人漸

吳公本姬姓束髮喜誦詩破產結賓客出伎歌新詞趣
尚樂山水入城但攢眉選勝亟嚮往扁舟載西施常恐
溘朝露不惜千金貲泰山有遺表遼鶴歸何遲

石高士蘊齡

若翁為邑博君遂為邑氓白鶴鍛雙翮棲棲向雞羣乘
興灑翰墨率意成丹青詎諧隱吳市和光復同塵側注
傲冠冕於我如浮雲

朱文學訪

予道尚孤潔闌闌皆蓬蒿偶拾江臯珮萋菲生青袍歸
家徒四壁滿屋掛蠟蛸文君吟白頭相如讀離騷蓋棺
土不掩空有諸兒曹

潘逸人宿

德輝江湖客笑傲王公前入山訪桑苧時開顧渚船謔
浪傾四座新聲亦翩翩耽棋夜分寐留朋涉芳園老為
孟嘗客瀟灑覺爾賢

沈國醫友忠

青囊乃餘事雅好論典墳家世業神術遊遨更多聞揮
灑落風雨高歌停白雲服食翻自誤地下應修文

曹氏園

半畝池連竹三間屋對花草玄揚子宅傳易種卿家白
日摩晴鶴青天點暮鴉客來村店近沽酒趣魚蝦

暮冬送顧孟及遷居

乾坤皆逆旅又復此離羣共作無家別同為落葉分壯

懷傷晚歲行色動寒雲以我他鄉淚臨歧灑贈君

冰雪淹旬詩以寄感二首

日灑爭春雪如珠亦間花望從梅處密舞到竹邊斜
高刹標紅寺孤舟釣白沙幸無沽酒債一月斷魚蝦

卧雪惟高枕傷春只閉門圍爐消白墮擁衲伴黃昏
覆壓從橫樹模糊遠近村又將寒食近依舊是消魂

和答曹三萊即事

載酒竹林過風流似永和常疑叩門響忽訝棹船歌
野

色浮青氣江聲湧白波小山中再約桂影月婆娑

秋莫過福源塔院贈靜修上人

暫釋塵中鞅聊舒老去身夙生如有約幻聚豈無因蝶
引徐行客魚窺久坐人一乘開覺路誰復問迷津

木芙蓉

冉冉木芙蓉翛然出翠叢破炎承曉露凌壑待秋風未
倚佳人醉先怡楚客容渚宮期不遠翬映夕陽紅

仲秋九日金吾弟淵泉訃至

半生南北各分天一晤重違又十年黃耳走殘吳地月
白鳥啼散薊門烟委先慈竹應難化長未孫枝亦可憐
老我獨存君不見夢魂飛遶落霞邊

鸚鵡病劇垂死百計療之得生

鸚鵡含顰憶隴山雕籠病翮欲飛難豈無縱爾西歸念
萬里鷹鷂妬羽翰

鄰鄉姪死一年矣詩以志哀

不違旬日便開尊底事今年靜掩門一十二番三五夜

獨留明月到黃昏

溪橋送客

柳下花前日半曛
赤欄橋外水如雲
黃金散盡無長物
留得鶯聲把贈君

洪秀才默

默字惟緘
烝弟隆萬間文學

宿東禪寺

薄暮維烟艇
循溪上講堂
山圖秋水濶
樹接浦雲長
僧

集諸天供風迴合殿香臺端聞寶偈心寂萬緣忘

陸郎中基恕

基恕字澹園以父光祖蔭工部郎

述懷

有序

予攝事通惠目茲民艱雖勉致寬政猶杯水救車
薪無補於炎炎也惻然寫懷以識感嘆

汎舟無榜人勞勞愧弘濟少年志沮喪卑秩多蹇滯司
農告不給秋稅從新制時艱但增慨匡救難為計多捐

念國貧重歛民為厲張羅置疎目寄惠在微細

項通判桂芳

桂芳字楚東襄毅玄孫官韶州通判有歸來草

南湖秋泛

水滿長湖一片秋微茫烟雨鏡中收芙蓉夾岼迎青雀
蘆荻平沙隱白鷗載酒自宜消歲月垂竿還擬向滄洲
採菱何處歌聲斷木落天高動客愁

楊李詩繫卷十四

欽定四庫全書

槁李詩繫卷十五

平湖沈李友編

明

藿園居士李應徵

應徵字伯遠號霽巖嘉興梅溪人萬曆癸酉舉人自少而孤稍長博極羣書沈司馬思孝深契之一時名流如屠長卿沈嘉則胡元瑞張孟奇皆與倡

和往還懷才悵悵十上公車乃就滁州學博蓋應
徵以駿宕之士雄視一世平生感憤一發於詩故
能衆體兼長摘詞獨富風流俊爽情旨婉切不徒
以寫景述事為工也著有青蓮館初編藿園集汗
漫遊藟易寓言寄茗漫草等集

琴者王生為予鼓石上流泉之曲走筆贈之

涼風颯颯天氣肅高樓置酒悲夜促新歌妙舞且暫停
聽君鼓却流泉曲指下泠泠百道鳴散入秋山萬溪玉

一絃一彈清我心欲斷不斷聲相續君不見齊門瑟燕
市筑獨立狂歌向人哭丈夫軼軻亦如此琴中之聲何
為爾

蘇生爾宣向嘗任俠報仇兼善秦漢篆刻近從
吳門過予山中作歌贈之

君不見專諸魚腸化秋水要離墳樹悲風起吳宮霸氣
久已銷俠骨猶然香未死蘇生寶劍光陸離少年報仇
人所知即今隱跡埋吳市劍鋒折作囊中錐黃金剖鵲

大如斗白玉盤螭壓雙紐雄心鏤向方寸中仇人血濺
丹砂紅秋山飛雨聲颯颯慘澹光鋌寒白日看君意氣
尚如虎那能老作江湖客丈夫腰下有昆吾何不東臬
島夷西擊胡試拂燕然一片石可堪還勒漢銘無

薛素臨趙承旨吹簫美人圖歌

有引

醉香道人出此圖見示墨韻道婉真得吳興三昧
蓋薛工于繪事而尤能以鳳簫度曲故宛轉曲盡
其態而所臨宋景濂學士題語真書數行更得臨

池之致此何必當年校書郎衿紳中恐亦罕此韻
士也今薛已歸沈景倩不可復見覩此如對寫照
徒增悵惋遂作歌焉

吳興王孫筆楚楚丹青貌得吹簫女宛轉如疑咽素秋
月白宵寒鳳飛去題識猶存學士名數行頗得臨池趣
誰人書畫兼擅場誰同趙宋稱雁行河東佳人小字素
妙曲曾將鳳簫度麗情秀壓錦江濤霞箋色奪芙蓉露
標韻俱從指下生妖妍獨向毫端吐吳興得似未得真

佳人貌畫兼貌身含嬌轉盼邀鳳史有聲無聲皆入神
此時珠簾散華燭此時紫簫奏新曲月痕依微脫口朱
星月參差動纖玉朱唇乍啓梁塵空玉指頻弄蘭心通
祇覺春風生合坐忽移形影向圖中圖中坐上宛相肖
羸女却對秦宮照天籟俄分倚獨鳴清音倏斷迷雙笑
獨鳴雙笑兩依稀只今化作彩雲飛驟然顧態猶疑是
覩久尋聲始覺非尋聲顧態神猶動巫峽荆臺別通夢
風前屢誤拂書蠅月下初聞罷簫鳳簫聲只隔鴛央水

鳳吹蛾眉呼欲起
司馬青衫濕盡無
春蘭寂寞秋風裏
南湖雨後見月

放舸傍莎汀
悠然笑獨醒
雨餘千樹黑
月出半湖青
水氣澄秋席
寒空寫夜亭
重輪元自現
烟霧莫冥冥

人日遣興

人日人爲客
春風春可憐
烟波浮宅遠
丘壑寄情偏
柏葉烏程酒
椒盤下若編
如從習池飲
醉卧峴山前

宿南禪廢寺

寥落春城寺，翛然對野僧。
庭烏朝下食，山鬼夜窺燈。
心義空微晤，塵勞斷未能。
松寮踈雨過，片月照枯藤。

花朝集徐德甫園亭

一室成丘壑，悠然會遠心。
餘寒春色淺，過雨藥闌深。
蜨戲纔窺幔，鶯啼稍出林。
綠尊留客醉，隨意坐花陰。

落葉二首

西風蕭颯戰初降，吹落長門淚共雙。
暗雜繁霜沉曉角，亂扶疎雨入秋江。
迷離空運深留屐，約畧寒山遠到窓。

掃盡玉階愁不去依依簾月對殘缸

朝來誰掃拂雲柯搖落偏宜傍晚多
漢苑哀螺曾入曲洞庭秋水忽生波
柝中影度關山月夢裡聲殘子夜歌
咫尺天涯人共遠滿林風雨下松蘿

新柳

舞罷春梢曉露清縷金試唱不勝情
忽牽鷗夢眠難定似怯鶯梭織未成
月影乍窺陶令宅風條漸拂漢家營
也知今日青青色強半萸枝向舊生

登薊門望塞外有感二首

經略當年西出師，曾傳塞外走燕支。
如何士馬東歸日，猶是朝廷右顧時。
風偃旌旗閒虎豹，月寒戈甲卧熊羆。
長歌一曲燕雲斷，坐聽高城鼓角悲。

帝障排空斥堠分，盧龍刁斗夜無聞。
單于避飲長城窟，都護移屯細柳軍。
鐵甲聚昏滄海日，朱旗遠繞黑山雲。
班生浪有如椽筆，不勒燕然第二勲。

悼亡詩為方衆父賦

玉魄千秋夜悲風起白楊黛銷塵鏡色粉落故衣香
蕙帳淒琴瑟金釵墮鳳凰魂應隨上婦貴不待中郎夢失
高堂宵猿啼楚峽長回思畫眉處彷彿嫁時粧

周評事從龍

從龍字彥雲號霖滄嘉興人萬厯癸酉舉人厯官
南大理評事著有繹聖堂稿其詩不多見據曹氏
詩選所收頗整繕不入輕靡蹊逕

題招隱君祠壁

荒亭雲落落沙竹雨綿綿漢詔無今日焦峰自昔年山
僧供祭酒天子賜江田踏盡寒莎路疎鐘破暝烟

懷某上人

一溪烟水背孤城洗鉢歸來落日晴幾憶支公舊蘭若
青山如在沃州行

夏知縣日葵

日葵字

闕

秀水人萬厯癸酉舉人官知縣

中秋三日駕湖詠月

結伴尋幽過水西
娟娟纖月印清溪
空中樓閣微茫見
望裏湖山遠近迷
光漏一痕涵皓兔
影搖千頃挂丹霓
秋宵佳色今伊始
莫惜頻頻玉腕攜

走奉新大綸

大綸字心易號華平立之曾孫萬厯甲戌進士試
政西曹時江陵東政進白燕紅蓮以為瑞綸言於
朝曰大臣不宜稱祥瑞啟侈心五月蓮固宜開即
不然物非其時謂之草妖燕玄鳥也白者金象兆

為兵奚瑞之有江陵聞而嘆之遂請教南昌遷泉
州司理時侍郎洪朝選失江陵意欲中以法綸嘆
曰洪公庇正醜邪范孟博之儔殺之非法乃為書
具陳天道人事不宜枉殺大臣以媚人江陵益嘆
之遂罷官又七年推補江西藩幕遷奉新令復與
上官不協掉首而歸卒年七十有一門人私謚曰
文介先生所輯永昭兩陵史七餘耕餘諸稿華平
集行世

九日遊柳州亭二首

伍相英魂何處尋
伍塘堤畔柳陰陰
漁舟未解西江劍
一飯空投下瀨金
都都故留忠楚計
無疆終殞報吳心
英雄幾掬恩讎淚
夜夜風濤自古今

貰酒狂歌鼓柁遊
憑高縹緲入層樓
耶溪尤物鶯花老
石室遺逋日夜愁
入郢漫酬無忌恨
使齊翻墮伯喆謀
伍塘千頃堤邊柳
猶帶寒鴉慙屬鏤

附考亭在嘉善伍子塘塘相傳子胥所開
長二十七里今城中南北水門其經流也

穀雨即事二首

早乘穀雨帶經鋤送酒人來問後除萬事皆慵猶種竹
千金散盡只留書長吟陡覺和風動安步徐看化日舒
不是狂夫偏玩世也知天地亦蘧廬

當門蘭茝故應鋤塞路荆榛詎易除雪水更無修禊侶
由拳剛有未焚書啞啞猿鶴聲猶咽楚楚松筠葉乍舒
滿目江湖休厝足祇須攜杖入匡廬

吳知縣正儒

正儒字醇之號貞所嘉興人萬厯丙子舉人官邑
令有巳午漫草

竹閣

亂山圍小閣
簾畫出湘雲
翠滴春猶冷
煙凝晝不分
已從憐勁節
更為惜清芬
寧別此君去
當歌至夕曛

許州判聞造

聞造字長儒號星石相卿子萬厯丙子舉人歷河
間東昌推官遷御史首諫東封條議兵餉糾大司

馬石星誤國與史官劉虞變不稱職狀皆人所不敢言未幾引疾歸起按甘肅單車過歷激揚吏士至勘松山功罪自大帥已下罰治有差聞礦使四出兩疏極諫又言臺省撫按諸臣之言百言而百不聽宦豎之言百言而百不疑是四海之威權歸之陛下而陛下之威權盡挈而歸之宦豎言甚峭厲遂落級為岢嵐州判歸家無疾卒著有詩文集奏疏家乘地理纂要蠶譜等書

懷錢淵父

南端初月上徙倚正懷人
秀句思錢起玄言愧許詢
雲光清戶牖竹色冷衣巾
更愛重湖曲涼風動白蘋

黃河舟中

日遇同鄉人風波那如許
欲寄平安書對面不得語

錢太學應曾

應曾字長卿籀之子萬厯間太學

問友人病

行踪兩月不相聞
鴻雁飛飛各有羣
採藥欲停何處屐
扶藜還看幾峰雲
奇書散漫癡憐我
瘦骨峻嶒病憶君
安得相逢明月夜
半窓竹影坐平分

錢蓬州應晉

應晉字次卿
應曾弟萬歷丙子舉人
官蓬州守有
閬風館集

重遊鷹窠頂同許長儒宿隱山上人房

重尋古刹遊相對
人如舊竹色墮虛檐
松風響清晝傑

構凌天梯飛泉決雲竇談禪向鳥窠聽潮六時候地遠
夢亦清寥寥忘宇宙鐘磬深夜聞月明在孤岫

金舉人九成

九成字伯韶號望虞秀米人幼以神童稱誦讀餘
暇便能旁涉稗官野乘出語驚人萬厯丙子年十
九領鄉薦屢上公車不售乃焚去郵傳不復北上
浮沉肆志與酒人劍客禪衲道侶締遺世超方之
交年僅三十九卒著有借竹軒稿春懷小草讀史

小論詩亦清利不俗

冬日偕江禹正諸君集天然圖畫閣移酌寶石峯

頂眺望

共上峰頭望嵐烟薄暮收
愛吟遲酒醖乘醉數漁舟
塔影沉波靜天風拂鬢秋
湖山自今古塵世幾同遊

再過桐岡書屋

竟日柴關掩穿林竹徑幽
歎賓猶舊主沽酒話新愁
翠樹深經雨黃花久占秋
匆匆城市去應愧昔年遊

韓同知子祁

子祁字心克號肖南平湖人萬厯丙子舉人授德
安推官又補贛州陞蘇州同知三董漕輓俱絕饋
送戊申春飄然歸里篋中惟書數卷石刻數種生
平以翰墨為樂為詩蒼老高潔有醞雞集尤善草
書得醉僧遺意時稱清簡其庶幾乎

陸藩儀別墅

抽簪結隱傍青霞五柳陰籠處士家壘石漸成飛鷺嶺

開池疑有蟄龍注新詞不入梁園簡曲徑分栽玄圃花
客去北窓甜睡足碧雲深塢誦南華

讀鄂王傳

山前山後盡王庭大將旌旗壓柳營海上浮圖俱下駟
岳家赤幟有先聲兩宮未復元戎意九伐方張國賊生
五國城枯南望眼康王已是諱稱兵

馮祭酒先生夢禎

夢禎字開之號具區晚號真實居士秀水人萬厯

丁丑會元選庶吉士授編修中遭廢黜起南司業
晉祭酒三年乞歸又九年而卒夢禎為人高曠不
喜作俗間生事往往以風流自賞移家武林築室
孤山之麓家藏快雪時晴帖因名其堂為紫栢可
公幅巾弟子蒲團接席究第一義復與虞德園徐
茂吳諸公倡酬四方學者日進身執經卷朱黃甲
乙禪燈丈室清歌洞房人望之以為仙真洞府卒
後人誌其墓曰位不大齒不尊而風流弘長衣被

海內謝安石之攜妓采藥房次律之鳴琴奕棋天下以王佐歸之固不以用不用為軒輊也今存快雪堂集若干卷其詩不習館閣語登臨古什追蹤陶謝律絕雖多艷體亦有生香真色之妙與高致不相妨也

賦得楊柳可藏烏

嫋嫋白門前藏烏倍可憐柔枝排影度密葉引雛穿啼合驚宵陌飛應破曉烟新知樂如此詎惜故腰妍

餘不溪迴舟寄訊章元禮吏部是日雨雪

吏部才名舊瓊瑶昔見詒山川聞間隔日月鬢毛衰身
退仍憂國家貧但賦詩迴舟緣興盡風雪寄相思

弔梅花道人墓

聞君畫梅亦畫竹祇是梅花名獨存香逕為君留素影
月邊容汝傲黃昏人歸舊里家何在墓托空門道益尊
唯有孤山林處士知心兩地薦芳蓀

無題二首

為憐飛絮趁遊絲一段春愁泣路岐莫道芳魂收未得
因風直上最高枝

琉璃硯匣鎮隨身彩筆揮來字字新他日長門如有恨
千金辭賦不求人

沈修撰自邵

自邵字茂仁號几軒啟原子萬厯丁丑進士選庶
吉士授檢討陞修撰自邵生而韶秀嗜學盡讀家
所藏書發為文章醇雅清麗無險巇詰屈之態年

僅三十有六著有詩文集

本覺寺三過堂

遵塗出枉渚弭權攀叢林石幢委陳莽殿壁生幽陰昔
賢此流憩登堂復沉吟代往跡如掃聲留感彌深悠悠
東逝波閱世成古今古今既已爾何用役吾心

送王侍御伯禎

關西王郎氣無敵手持白簡迴霜色都市驚呼鐵驕
驄殿頭捧下團龍敕此行暫作南畿使三輔秋風動旌旆

內地新紆復馬恩軍儲已足留田議羽書
項者奏甘泉
邊騎憑凌踏塞烟看君飛檄淨沙磧却笑從軍王仲宣
送葛太史鳳池封秦

清時幾歲直鑾坡百二峻函擁傳過定有使星催客蚤
已占真氣入關多小戎舊俗人如玉大國新盟帶是河
斗酒花前攜手別金莖東望莫蹉跎

陳儀制泰來

泰來字伯符一字員嶠平湖人萬曆丁丑進士歸

娶賜內府金花龍燈州里榮之累官儀制員外郎
疏請建儲不報忽傳三王並封草疏死諍又面質
王文肅於朝旁觀悚慄卒寢封議尋以疏救孫鏞
謫饒平典史自賦有直道不緣三黜改孤忠只受
九重知句年三十六卒於荅川光宗立錄贈光祿
少卿有員嶠集初謫歸時夢至一山見羣仙咸集
共賦云涼風拂拂白雲收宦海茫茫幾日休剪紙
作驢輕撥刺桃花洞口笑淹留旁有仙曰汝乾凌

子也後一年當會於此歿後翁哭之慟適遇方士
能作飛符召魂術翁為祈請附乩書曰仙謫之期
止此非不思我阿翁然數有限慟奚為遂賦詩以
別泰來慷慨有才畧與顧憲成趙南星諸公咸氣
節自負竟以抗直困下位夫人營織而食後復貶
竄流離以死嗣子無傳風流頓盡悲夫

贈揭山人

乾坤一散人家在吳山下裏糧遊五嶽自言畢婚嫁口

讀軒轅經指掌泄造化似餐紫桂實曾覩青渠謝大藥
可延年訪道無休暇倘逢八公侶將拔白雪舍

懷周元孚民部

周郎文武備間氣起蘄黃倒峽春濤壯凌霄紫色長人
誰似匡弼天不老馮唐湘水行吟日應知笑楚狂

寄魏懋中南司勳

抗疏英名震九垓憂時重見洛陽才風流贏得山公署
翫醴應非子建哀蘿薜雲深休自戀芙蓉秋老向人開

金方田月令
卷十五
凌波欲往無舟楫幾望新亭灑涕回

塞曲二首

黃雲四合角聲哀擐甲先登烽火臺十道控弦齊落馬
幕中賓客上功來

哀笳動地逼長城細柳營中輒夜驚老弱嬰城壯士死
將軍高枕聽秦笙

朱秀才元弼

元弼字良叔號武原海鹽人萬厯初茂才安貧力

學事後母以孝聞門人私謚曰達隱先生著有猶
及編獨醉菴集

送朱官宇遊洪都時予課其伯子

秦山何青青秦溪月在亭與君一攜手共指牀頭酒一
尊潑醅未曾開苔上春鴻入幕來時君欲度滄江去期
予雪後梅花署安得輕絲繫紙鳶相隨萬里秦離絃朝
朝暮暮滕王閣明月當窻長不落君須記取碧珊瑚歸
來莫怨東風惡

題朱辛江便面

自少圖名意誰言世不知僧求開寺記客送買山資細
雨魚翻藻斜陽燕哺泥平生無事迫辛苦為尋詩

屠副使叔方

叔方字宗直號瞻山應峻子萬厯丁丑進士授鄱
陽知縣先是遜國諸臣疎屬一丁一地分戍劇邊
一遇絕丁輒行勾補飛符所到寃結二百餘年方
之令鄙也適有符勾鄙人胡閏絕丁者方憤然擲

符於地曰彼死忠何罪其親屬又何罪使吾有言
責必碎首爭之矣擢御史即為具疏請謚請祠請
修治塚墓卹錄子孫及交遊姻黨之株累編戍者
一體赦宥神宗感動蒙宥者千六百餘人京師張
赦榜時忽風發榜飛轉展天際觀者如市自午至
未仍還故所鄱陽張榜亦然事見顧憲成英風紀
異錄中轉山東副使乞歸著建文朝野彙編行世
讀外舅功德贈言有感二首有

司空公視師海上予時尚幼猶記督府胡公宗憲欲
寬大寇徐海之誅以司空之令應時殄滅吾湖故老
一一能誦之既乃功歸督府謗集司空至今不敢頌
言其伐議者惜焉書此志感

江波猶自鼓悲風廟食今傳在甬東壯士由來思倚劍
浮言誰復念韜弓當年帝寵元稱渥此日羣情已抱公
天意也憐功未賞有孫新得薦南宮

中山嘗憶謗心驚讀罷新篇恨未平豈直粉榆全保障

應知吳越賴長城蒼生並脫燃眉急青史唯傳折股名
方略於今零落盡深慙李漢善為甥

漢是韓退之婿
能纂退之文集

孫副使成泰

成泰字允交號景屋簡肅公季子萬歷丁丑進士
授道州知州革市販例輸官稅陞蘇州同知濬諸
水利民賴之歷刑部郎陞邵武知府調蘇州終大
名副使產不踰中人稱廉吏云

送尤司訓

送君湖上正晴曛
楚水吳山咫尺分
今日莫辭杯底醉
數聲離笛片帆雲

黃副使正色

正色字貞所秀水人
萬曆丁丑進士官漳南副使

三塔

諸天開霽色烟水望中分
塔影搖清漢鐘聲響白雲
鳥遷雙樹曉僧定異香聞
羨爾空林下翛然隔世氛

陳舉人光贊

光贊字李襄吳江徐田人徙居秀水領萬厯己卯鄉薦有川流集

野老庵為董朝獻題

湖上草堂生綠苔荆扉長對小亭開臨池人識右軍宅
玩世時拈張翰杯柳岼及泉秋月上石橋垂釣水雲來
與君放浪形骸外汀鷺沙鷗總不猜

孫舉人成名

成名字允仁號儀蜃簡肅公仲子萬厯己卯舉人

自號超然道人有薄遊漫草兩京浪遊集

釣鰲磯

湖面溶溶九派秋碧闌高映彩虹流磯橫春雨桃花浪
簾捲東風燕子樓此日釣鰲成五馬當年放鶴有孤洲
明公為築湖中石次第龍門下玉鉤

馮貞孝伯禮

伯禮字節之號讓伯太僕敏功子萬厯中太學生
太僕卒官有賻四百金以遺命築寶應堤生平負

奇任俠事母以孝聞好讀異書行文饒有風骨客
燕六年無所遇而卒當是時西吳鮑應選江右歐
陽瑛俱遊都下與伯禮為文字交時兩生俱無子
伯禮出橐裝為兩生買妾開別館以授之兩生各
舉一子故伯禮之卒也天下名士為執筆弔誅者
數十百人而兩生之文尤佳其孤洪業扶喪南歸
沈司馬思孝采輿情謨議私謚曰貞孝所著剩言
一卷春秋羅纂十卷皆不傳

舟過仲祠下見先太僕手墨涕淚染毫成八韻
舟維水市寒遠見任城暮兩岍積人烟有祠祀子路前
閣垂丹青後篋開鉛素驚看父手題悲使兒魂仆錚錚
言可聞簌簌淚如注只今蒲綠深何似淮黃怒事嗟往
境馳政覺留神顧憐予負笈趨此去將誰遇

沈郎中堯中

堯中字執甫號瀛壺嘉興人萬厯庚辰進士起家
縣令歷陞南刑部郎博學嗜古明於典故纂修本

郡志著有沈司冠集及沈氏學跋治統紀畧邊等
七畧高士彙林等書所構城南白苧邨居有東郭
草亭南陔堂王弇州為記又有題沈執甫釣叟圖
詩云蟠溪老翁八十餘此翁釣侯非釣魚若言軒
冕異丘壑虞聖亦稱雷澤漁胸中但貯小雲夢焉
用形跡分區區沈君家住萼蘆鄉綠蓑衣底天茫
茫一朝鵬化擊寥廓九萬里翼雲飛揚雖然得意
挂朝籍忽忽舊遊中不憚晨從大國問烹鮮夕向

窮閭憂竭澤孫枝為寫湖頭色展看烟波流几席
賀監禿酒徒病昏無所知始乞黃冠去鑑湖能幾時
桓家小孺子躁心在塵網何必解郡符始稱五湖
長而我故是王弘之釣亦不得神長怡藉令物色
羊裘去終許菰蘆明月知

中秋烟雨樓望月

澎湖此夜月常滿遊子數年纔得還老去不諳新世路
醉中猶識舊家山波光潋灩浮青雀桂影婆娑擁翠鬟

最是橫江羽衣客
數聲清唳落人間

海鹽觀海

長堤東望浩無垓
萬里滄溟一鑑開
石柱近從潮外落
沙棠遙向日邊來
吞天隱見蒼龍角
仙島參差紫鳳毰
便欲乘風慕冲舉
不知何處是蓬萊

松臯積雪

東郭先生坐小舲
雪中棹入荻蘆汀
江天漫漫迷歸路
猶認松頭數點青

亭邨烟雨

誰道城東烟雨多半邨
桑柘半邨莎山深不識朱衣吏
春社年年燕子過

梅顛道人周履靖

履靖字逸之號梅墟秀水人萬厯中布衣築舍鴛
湖之濱種梅百餘株時呼唔其下人呼為梅顛道
人自稱螺冠子著述甚富刻有梅顛稿

過殷方叔齋次舩公韻

西澣曾聞隱接輿
朝來得叩白雲居
竹窓槩几清如許
手自丹鉛種樹書

項中書穆

穆字德醇號蘭臺元汴之子萬厯初以賢進官中
書書畫有家法今存貞玄子詩

與友人話舊

經年南北嗟長別
今夕相逢興轉豪
雨過捲簾看桂影
風來留客聽松濤
半生事業徒殘卷
萬慮消除祇濁醪

飢氣已占遙應斗明時何復賦離騷

柳枝

涇雨沾泥若見憐穿紅遶紫乍爭妍不如落水為萍葉
任著東風處處圓

馬主事維銘

維銘字弘衢號新甫平湖人萬厯庚辰進士授太
平知縣攤二畝三分之稅丈科一畝豁黃山虛糧
數百頃陞兵部主事督山海關革貂皮稅以艱歸

築牧園於東湖上飲酒賦詩自號屏提生有史纂
廣文選池塘草諸刻

拜石齋送鄭醒生鴻臚北上

慙無醒酒石醉後逢醒生君乃獨醒者云作薊門行天
子自明聖羣公贊太平君向府中趨手版能為情雖縻
長安米亦遊大人名豈為麴蘖苦吏治揚其聲仍當酌
一斗與爾解餘醒

陸通政長庚

長庚字元白號津陽平湖人萬厯庚辰進士授廣
德州知州釋寃獄六案去大量浮額創水陽倉以免陸
運之苦裁革緞價四千餘兩禁北鄉煤山採貢等事
州人德之陞刑部員外歷陞湖南道覈長沙屯糧侵
蝕以俾軍需轉桂平道徭首韋扶仲盤花婆擾府江
出沒荔浦時用兵三萬五千糜餉十二萬長庚請撤
兵賊果懈長庚密遣副將童元震夜至白馬冲襲之
賊大敗八寨悉平播酋楊應龍反陞湖廣按察使移

治上游提兵擒之陞江西布政歷府尹晉南通政使
乞歸尋陞兵部侍郎固辭卒年七十有八

感興呈景陽允

林藪原吾志年來遠市朝青山歸計穩白髮壯心凋夢
逐翻風蜨名疑覆鹿蕉小窓休沐暇閒步誦逍遙

遊龍光寺

玉沙盤遶作龍眠古寺中藏小洞天百尺孤松棲白鶴
一池寒水印青蓮上方鐘靜雲生榻別浦僧歸月滿船

到此徘徊常竟日年來官況已如禪

項太學道民

道民字民逸元淇季子幼韶慧能詩長益駿發時
馮開之李伯遠皆孝廉負盛名道民鼎足其間文
酒淋漓風流掩映迨開之魁天下伯遠終數奇不
售道民一日忽盡焚其制義耽禪悅石磴繩牀蕭
然一室中六時諷唄不輟也獨不廢吟咏冲和簡
遠具雅人深致有春暉堂詩

經臨安縣

碧澗侵橋澗青山繞縣斜林深惟鹿豕樹老成龍蛇野
飯燒松子籬香散栗花烟雲前路暝燈火宿誰家

出龍江關得李玄白亦罷浙闡信

爾命仍難達予懷祇自憐吟邊嫌句短客裏得愁先黃
菊深歸興澄江穩晝眠顛毛種種矣非復棄繻年

賦得團扇代姬贈別

妾命仍宜爾君心詎不同曾攜懷袖裏幾抱月明中巧

製裁班女新詩出漢宮炎涼自有分豈敢怨秋風

蛺蝶

栩栩雙飛蛺蝶書帷點絳紗掠人輕撲粉避雀巧穿花
露香鬚溼迎風錦翅斜憑君幽夢遠隨意繞天涯

初秋

庭際忽開朗初秋蔓架除林香收蛩蛩蛙翠長新蔬避
客扉常掩無人髮懶梳松窗燈火夜還有課兒書

寒夜懷李玄白在吳門

熏籠香自暖茗椀過三更凍月含霜氣迴風走葉聲殘
燈沉幔冷棲鳥壓枝驚此夜難成寐寒衾念友生

遊故郭武定侯園

先朝貴主故侯家野圃東陵學種瓜金埒晝閒天廐馬
玉堂晴鎖上林花鳳鸞響斷無瑤管蛺蝶圖殘有絳紗
青鬢少兒頭白盡自翻新譜按琵琶

送陳侍御出守韶陽

使君五馬下東方幾載明光草諫章驛路幽花香豈冠

離亭秋樹暗枕榔卜雞自化夷獠俗驅鱣能清瘴海鄉
漢代即今客汲黯豈留長卧在淮陽

暮春山莊即事

溪上田田蓮葉齊
牆頭箇箇竹枝低
長春花發香凝砌
半夏苗生藥滿畦
道貌只宜居士服
清齋何恠太常妻
偶緣對客時揮麈
每為看山獨杖藜

包知州世杰

世杰初名文熠字襲明號心弦秀水人萬歷壬午

科官知州

秋夜同黃玄之招何士抑沈孺休孫世聲飲

湖上

且欲留君醉綠莎只今誰復嘆蹉跎
放船花外尋洲渚攜手沙邊看芰荷
明月似隨歌扇滿涼風偏向舞衣多
五湖不惜烟波濶欲去菰蘆奈若何

史貢士羊生

羊生字玄年號鶯湖吳江人僑居郡城萬厯初歲

貢有吟畧一卷孫亶亦能詩

閨思

秋來庭院夜生涼
絡緯聲多思更長
莫向交河啼漢壘
寒衣擣盡未成裝

沈教授大奎

大奎字子聚號澹滄嘉善人萬厯初明經官教授
有澹滄集

歸途作

蘆墟四望水粼粼寂寞孤邨絕
四鄰茅屋數椽無犬吠
獨餘殘月照歸人

馮秀才盛世

盛世字濟之號念羅嘉善人萬厯初文學有桑榆

館集

慕容家自魯企由谷歌二首

慕容家何在谷深不可尋
少年抱綠綺相見即知音
有谷慕容居有桑慕容樹蠶織製錦衣從戎入句注

胡學究碧霞

碧霞失名嘉興梅溪人萬厯初學究其詩章一帙
題曰百憂集詩亦清勁無俗調

雨

細雨如絲引空濛夾霧輕霑衣纔見溼落葉更無聲旋
入行雲去常滋蔓草生檐楹聊騁望徙倚更多情

次李二仲美避暑雨上人竹院

逃暑翠微際還從丈道居竹光團砌滑山真入簾虛謝

客惟聞鳥澄懷並廢書坐深消白晝塵世復何如

草堂漫興

滿院清陰午半殘松花香染石牀寒幽棲白日憑詩卷蕭
散青林自籜冠避地祇分隣水竹種花時葺傍池欄主
人會有投閒意幾處看山興未闌

朱文恪公國祚

國祚字兆隆號養淳秀水人萬厯癸未狀元授修
撰歷禮吏侍郎光宗立起禮部尚書命下而光宗

晏駕熹宗嗣位與葉向高同赴召晉少保武英殿大學士因䟽救大司寇王紀不報嘆曰去大臣如小吏事不可為矣遂告歸卒贈太傅謚文恪有介石齋集國祚學問淹雅言行醇篤為政持大體以清白自勵方其為宗伯也東朝未建祚先後䟽請言甚剴切錦衣鄭國泰希賢妃旨倡先冠婚後冊立之議祚復請誅國泰神宗感悟一夕召祚甚亟至宮門傳旨冊立并封福瑞惠桂四王倉卒奉上

諭而儀注預定鉅典遂行皆祚力也已因災異請
罷開礦撤稅使舉趙世卿為少宰救諫官曹學程
王德完等皆不令知之及入相凡於人才用舍軍
旅虛實諸務雖閣議紛然而祚片言立決可謂有
大臣之風矣

遊石佛寺

靈境深沈試一過俗氛原不到巖阿亭亭老檜乘雲氣
了了危峯冒薜蘿烟鎖空林人迹絕香浮寶地梵音多

從今願學無生法，攘攘塵埃奈我何。

贈麻衣和尚

莫言師嗜酒，酒原是米汁。世人自言醒，顛倒混黑白。

東朝即事二首

殿庭香藹接雲平，一道爐函夾陛行。肅肅講臣齊鵠立，

金蓮影裏喚先生。

琉璃光潤絕塵埃，咫尺甘霖遍九垓。猶恐侍臣侵履涇，

宣從殿側左邊來。

岳郎中元聲

元聲字之初號石帆一號潛初子嘉興人萬厯癸未進士由旌德令歷國子監丞詔選良家上疏諫止并言用銅械撻官侍為傷仁神廟納之陞工部郎時有三王並封之議元聲與顧允成張納陞上書復與陳泰來等八人面質相臣於朝又移書比之林甫敬宗相臣始有三誤三愧之疏事乃寢後以奸人沈惟敬日本封貢事元聲三疏爭之落職

里居天啟初起南光祿卿累轉兵部侍郎魏璫擅
政應山楊公劾其二十四罪得嚴旨元聲發憤與
同官陳道亨等公疏觸璫怒道亨稱疾去臺臣以
他事劾元聲削籍思宗御極復原官然元聲已無
宦情築室孤山歲寒巖以老感念東林死難諸友
勒名於石而為之記且作詩弔之有潛初子集

過石佛寺

聞道靡喧寂幽林強自過有生皆爛漫無計出婆娑細

雨衝泥滑新涼入檻多夢回聽法鼓清意在山阿

贈錢比部讞恤三輔兼懷燕趙諸君子

使節風流出帝畿陽春白雪正霏霏含香畫省分雞舌
珥筆天垣綴玉衣寧俟璽書封少府佇看睇石靜園扉
相逢燕趙諸君子為道山人飽翠微

鍾薊州起鳳

起鳳字羽王崇德人萬厯乙酉舉人官薊州守

息劼園

結廬少城隈種竹不盈畝巷列七頭松門栽五株柳綠
水浸橫塘紅菱間白藕石砭平於岬有亭大如斗桃李
紛南榮桂杏排北牖頌橘懷餘馨妻梅絕塵垢四序遞
芳妍鑒賞來鄰叟彼我各忘言時傾一杯酒

俞太學懋相

懋相字元簡號季暘平湖人萬厯間由諸生入雍
無所遇賦詩自娛名曰酣語

馮司成招集梅花莊出歌姬佐酒次年復遊而司

成已故感賦此詩

司成娛客地零落幾人哀
高館啼黃鳥空除見綠苔
容華隨淚盡歌舞逐愁來
此日孤鸞調吹彈向夜臺

為沈白巖悼妓

年少當場曲未終
忽驚芳信罷簾櫳
楚山蜨夢雲俱冷
湖水鴛波月乍空
即有香痕應化碧
徒留絃管自銷紅
沈郎多少胭脂淚
零落春風夜雨中

落花

誰將靈藥駐芳年轉盼紅塵歎逝川試問粉香消受處
風情多在鳳頭邊

呂太學元聲

元聲字

開

海鹽人萬厯間太學生

武原紀災詩

少小見人說饑餒壬子兵荒辛酉水此時飽食不關懷
老大方知窮戊子兩年田白無草生到處瘟黃死人死
米不滿斛值百千人猶鎖棧等價錢餓夫伸手頭搶地

寒士束腹呼高天家廩纔餘三百石一日恐作兩日吃
升錢減半周貧閭五日爭門廩底出忽傳湖廣失新來
家戶看看改顏色通商亦是救荒策昔人有言毋過糴

附考武原鄉即今平湖縣十八十九二都地也吳越
春秋云吳增封越地北至平原徐天佑註即武原越
絕書云覲鄉北為武原其名最古秦時海鹽陷為柘
湖移治此鄉漢順帝時海鹽又陷為當湖復移治明
宣德間於此
立平湖縣

孫副使光啟

光啟字子昭嘉興人萬厯癸未進士仕比部出守

惠州爭王子龍獄忤上官意遂以疾請歸補延平
不赴再補濟南尋以異等遷秩備兵沂州轉陞漳
南巡道竟以議事卒於福州公署

去惠州作

捧檄莅茲土勞勞未匝歲本思宣上德祇自速厥戾曷
勿如脂韋而廼同薑桂由來性夙成並不解阿世翫
每招尤落落誰相契人生貴知幾出處何必泥矧且嬰
錮疾亦復需調劑無藥可醫狂自分當淪替所以輕簪

組一官等疣贅寧去無寧就非夷固非惠殷勤辭父老
慷慨謝輿隸相顧更惓惓歛歛各垂涕豈知冰雪腸榮
祿非所計君門萬里遙縹緲青雲際翹首合江樓臨江
漫凝睇皎皎羅浮月纖靄不能蔽涓涓豐湖水東流不
少滯行矣挂蒲帆悠哉去海裔秋萍逐浪飄野鶴乘風
唳俯仰任優游襟懷自光霽故園松菊存歸來足休憩
吁嗟陶彭澤高風愧難繼

陸處士長春

長春字景陽長庚從兄隱居種德萬歷丁亥大疫
蚤起見五鬼竊語曰正人在我輩當避之一方竟

無染者

題木芙蓉畫冊

鏡下誰年少
花間獨女郎
楚江顛顚極
昨夜染秋霜

稿李詩繫卷十五